



### EDITORIAL

## Igpabilin an militansya atubangan han ginpakusog nga pasista nga pangatake

Waray hunong an pasista nga pangatake han 8th Infantry Division-Philippine Army ha masa nga parag-uma ha Eastern Visayas. Gin-imponer hini an usa nga diri deklarado nga balaud militar ha kabaryuhan agud piriton an mga sibilyan nga sumurender. Ginkontrol han mga sundalo an ira sakob-gawas ha baryo, gindidid-an hira nga mag-uma, ngan ginkakanyon an ira mga umhanan. Ginsisingabot han 8th ID an grabe nga kakablasan ngan kagutom agud piriton an masa nga pilion na la an pagsurender.

Maaram an 8th ID han maiha nga kasaysayan han militansya ngan rebolusyunaryo nga diwa han masa ha Eastern Visayas. Sanglit, ginpauswag hini an kampanya han pagpasurender. Labaw nga mas madarahug an mga pamaagi han pagpatay, pagtarhug, ngan pan-gigipit. Maaram hira nga kun diri suportahan han masa an BHB, magigipit nira an BHB ngadto ha hul-os nga militar nga sitwasyon para ha desisibo nga pagpuyopoy. Ginruruba nira an pagkakaurusa agud perdhon an BHB, hadlukon an masa nga did-an an rebolusyon, ngan magpadayon an paniniyupi ngan

pananalumpigos ha mga parag-uma. Bisan pa sumurender an mga inosente nga sibilyan, diri nira makakab-ot an tinuod nga kamurayawan.

Kundi ginpapakyas han masa nga parag-uma an pasismo han 8th ID. Ginpapaypayan han pasista nga todo-gerra an kangalas han masa ha naghahadi nga sistema ngan an paglarab han kalayo han rebolusyon. Padayon nga ginhangkupan han masa an BHB. Yana, naghiluag ngan naghilarum an base panmasa nga nalalanguyan han BHB agud makamaniobra, igpabilin han BHB nga buta ngan bungol an kaaway, ngan mapasuntok ini ha hangin. Buaw an paghihinambog han 8th ID nga mapeperdi hini an BHB yana nga tuig.

Atubangan han pasista nga pangatake, kinahanglan magpabilin nga militante, maisog ngan nagkakaurusa an masa nga parag-uma. Ha pagpadayon han ira pakigbisog kontra ha pasismo ngan paniniyupi, mapapakyas an kampanya han pagpasurender han 8th ID. Magpabilin nga mahugot an ira pagkakaurusa ngan mapaso an pagsuporta ha rebolusyon ngadto ha pagkab-ot han makatadungan nga kabuwason. ■

## Sibilyan, ginpatay han AFP ha Eastern Samar

USA NGA SIBILYAN nga mayda sakit ha hunahuna an waray kaluoy nga ginpatay han mga tropa han 78th Infantry Battalion ha Dolores, Eastern Samar.

Ha sumat han BHB-Eastern Samar (Sergio Lobina Command), ginpatay han mga elemento han Charlie Company, 78th IB ha pangunguna ni 2nd Lt. Christopher Noynoy Tenteo an usa nga sibilyan nga nakakita ha agway han militar ngan BHB ha Sitio Kabugawan, Brgy. Aroganga hadton Agosto 16.

Ha kahuna han usa nga sundalo nga granada an ginlabog ha iya nga lubi han biktima, dayon niya nga ginpusil an waray kapas umato nga sibilyan. Kundi agud tahuban an ira krimen, ginpagawas han 78th IB nga usa nga Pula nga mangaraway an biktima. Reklamo han pamilya hini, kagagawas pa la han biktima tikang ha usa nga pasilidad para ha mga mayda sakit ha hunahuna ha Metro Manila. Waray naman nahibang nga pwera han BHB.

Nanawagan hi Fr. Santiago "Ka Sanny" Salas han National Democratic Front-Eastern Visayas nga angay imbestigahon han Commission on Human Rights ngan iba pa nga grupo nga tagdependa han tawhanon nga katungod ini nga pang-abuso. Kinahanglan liwat tanggalon ha posisyon ngan papagbatunon hira 2nd Lt. Tenteo, sugad liwat an mga kumander han 78th IB, 801st Infantry Brigade ngan 8th Infantry Division ha pag-atentar nira nga tahuban an krimen.

Nanawagan liwat hi Fr. Salas ha BHB nga pagbatunon an mga pinakalanong nga parupanalapas ha mga pasista nga tropa han rehimen US-Duterte agud mapahimatnungan hira nga diri pasasagdan la an ira kamadarahug. ■

## Marayhak nga buruhaton pan-ekonomiya han BHB, PKM

Ha Northern Samar, marayhak nga ginpapauswag han mga kaapi han Bagong Hukbong Bayan (BHB) ngan Pambansang Katipunan ng mga Magbubukid (PKM) an buruhaton pan-ekonomiya komo pag-atubang ha epekto han resesyon ha pakabuhi han masa ngan lohistikal nga panginahanglan han hukbo.

Ha usa nga klaster, gintrabaho han platon han BHB an usa nga kumpiskado nga umhanan agud tamnan hin maabot 14.5 kagantang han pugas, mga duma ngan utanon sugad han karabasa, ampalaya ngan okra. Tuyo nira nga makaani han bugas para ighatag ha mga pamilya han mga pultaymer ngan igiistak para ha panahon han gipit nga sitwasyon militar. Dirudiretso nga gintrabaho han mga Pula nga mangaraway an uma tikang ha pagsunog, pagpugas ngan pagdalos, ngan panapanahon na la nga ginbabalikan. Ginlalauman nga maabot 30-40 kasako han humay an maaani nira yana nga bulan.

Ha usa nga ginrerekoher nga erya, nagbuburublig an mga kaapi han 10 nga tsapter han PKM tikang ha duha nga klaster agud trabahuon an komunal nira nga umhanan han banika, mga utanon ngan herbal nga tanom. Boluntaryo an pagtrabaho hini nga uma. Para naman ha ira mga indibidwal nga uma, ginhihimo nira an tiklos-araglayon. Pito ngada napulo nga kaapi han PKM an nagbubug-os han usa nga gru-

po nga nagbuburublig nga trabahuon an magkahigripid nira nga uma.

Nakatukod naman an usa nga tsapter han PKM han tindahan nga koooperatiba. Dekada na an nakalabay han una nga gintukod an ira koop kundi ginpaserra ini tungod ha mga internal nga problema han pamunuan. Antes ini utro nga tukuron, ginsumada la anay an mga nagin limitasyon han una nga koop ngan utro nga nag-assemblya kabahin hini. Kaparte han pag-ayad han organisasyon an pagbalik ha koop labina yana nga grabe an paghitaas han presyo han mga paplitan. Barato kaupay an baligya han koop nga bisan an mga molupyo han iba nga baryo dinhi na la napalit.

Nag-aandam na an BHB ngan kaapihan han PKM hini nga mga klaster para ha paglansar han kontrapyudal nga pakigbisog. Ginapapahilarum nira an ira pankatilingban nga imbestigasyon ngan makurimot nga naghihimo han *case study* agud makab-ot an mas makatadungan nga pan-ekonomiya nga kamutangan para ha mga parag-uma. ■

## Panmilitar nga kumperensya han YM, ginlansar

MASOBRA USA KAGATOS nga Pula nga mangaraway an nagtirok ha usa nga klaster ha Northern Samar agud iglansar an kumperensya militar han yunit milisya (YM) hadin Agosto.

Hini nga usa kaadlaw nga kumperensya, gintukod an Militia Cluster Command (MCC) komo natindog nga kumand han ira klaster. An mga trabaho nga gintuin dinhi amo an pagdepensa ha klaster, paglansar han mga batakan nga taktikal nga opensiba, ngan buruhaton masa.

Ha kumperensya, ginhatagan-duon an panginahanglan nga mas magin aktibo an mga YM ha pg-ato ngan pagpakyas han pasista nga pangangatake han kaaway. Kinahanglan liwat ig-isa an ira kapas komo baton ha nagbabag-o nga nasyunal ngan panmilitar nga sitwasyon. Ginpasaro an eksperyensya han gerra han katawhan ha nasud Vietnam, an regulasyon han platon gerilya, ngan an oryentasyon han MCC. Ginkaurusahan liwat nga kinahanglan magburublig an mga tsapter han PKM ha pagpanginano han panginahanglan han mga pamilya han mga partaym nga kaapi han YM. ■



## Kampanya han pagpasurender ha Western Samar, natikakusog

LABAW NGA NATIKAKUSOG ngan natikahiluag an kampanya han saywar ngan pagpasurender han 8th Infantry Division ha masa nga parag-uma ha Western Samar pinaagi han mga operasyon nga Retooled Community Support Program (RCSP), sigon ha Bagong Hukbong Bayan-Western Samar (Arnulfo Ortiz Command o AOC). Dugang nga pakuri ini ha mga parag-uma ha panahon nga limitado an ira pakabuhi tungod ha krisis ha ekonomya ngan ha pandemya.

Ha Brgy. San Nicolas, San Jose de Buan, maabot 39 nga pamilya an gindidid-an nga anihon an ira hinog nga paray kun diri hira sumurender ha militar. Maabot 2,808 kasako kunta han pagkaon, igbaraligya ngan igiistak nga bugas para hini nga tuig an diri nira makukuha tungod ha pan-gigipit han mga sundalo. Ha kahadlok, napiritan mag-ebakwet an mga residente diin ha Sitio Salvacion hini nga barangay, lima kapamilya na la an waray pa gumikan.

Ha pareho nga bungto, iginpailarum na ha RCSP han 87th Infantry Battalion ngan 14th IB an mga sityo han Galutan ngan San Pedro ha Brgy. Hagbay ngan an Brgy. Cataydungan. Magkulop nga ginpapatukar ha *loudspeaker* an mga kontrarebolusyunaryo nga panawagan han pagpasurender ha komunidad. Dugang ini nga mga baryo ha nahiuna na nga ginpailarum ha RCSP hadin Mayo.

Ginkokontrol naman an gios han masa ha mga baryo nga hadto pa mayda operasyon han RCSP. Kalakip dinhi an Gusa, Aguingayan, San Nicolas, Can-aponte, Hagbay, ngan Sitio Fernandez ha San Jose de Buan, ngan Beri ngan Canvais ha Motiong. Duha ngada tulo nga residente la an gintutugutan nga gumawas kada higayon ngan kinahanglan magsarit anay hira ha mga sundalo. ■